

## Präsidentin-Jahresbericht GV 2020

A de GV letscht Johr hemmers wüerkli gschaftt  
Und eusi Pendenz die neue Statute endlich vollbracht  
Sie sind ohni Problem zum Abstimme cho  
Und händ es guts Zeiche hinder lo

Im März hämmer's Ufgebot für d' Sportsitzig übercho  
D'Astrid und ich sind uf Lostorf gfahre dodezue do  
Mir sind gspannt gsi uf die Überraschig wo a kündigt gsi isch  
Und händ grossi Auge gmacht womers gseh händ was es isch.

Im Saal sind alles langjährigi Leiter und Leiterinne gsässe  
Und was denn zeiget wurde isch – das muesch grad wieder vergässe  
Es isch vorgstellt wurde wiemer e Turnstund ufbaue sött  
Die Überraschig isch wüerkli nüd grad prächtig a cho bi de Lüt.

De Veteranetag isch ebefalls vo de Lostorfer überno wurde debi  
Mir vo Wettige sind mit eme schöni Grüppli awesend gsi  
D' Versammlig isch eigentlich scho immer's glich und doch  
Es isch en Träffpunkt mit viel Bekannte und Ustusch noch und noch

D'Steffisburger händ d'DV Satus Schwiz übernoh  
D'Karin und ich sind als Delegierte agreist der noh  
Es het denn am Nomitag no en Idee findig stattgfunde  
Über bestimmti Theme und het denn am Schluss alles verbunde.

Wer weiss vielleicht git's in nächschter Zukunft euse Verband nümme  
Das heisst es git denn nume no ein grosse Verband wo würdi gwünne  
D'Meinige sind dodrüber aber nüd überall klar  
Drum düemmer abwarte bis das alles wird wohr.

A de GV vo de Handballerinne han ich vernoh  
Dass sich de Vorstand Gedanke gmacht het wie's mit em BSC witergot  
Öb sie sich voll im SCS aschlüsse tüend  
Und alli Spielerinne i dem Fall überträte müend.

Die Infos söttet spöter no cho sobald d'Abklärige gmacht wurde sind  
Das isch versproche wurde vom TK Verantwortlich nüd nume blind  
Sie wänd denn orientiere was wüerkli denn lauft  
oder wie sie sich denn das Ganze zäme raufft

S'Turnfäscht in Aarau das isch de grossi hit  
Do gömmer doch go hälfe do mached mir mit  
Aber ohalätz do sind no e paar Stolperstei im Wäg  
Drumm lömmer's au si und nämed das Ganze als Gäg

D'Netzballerinne sind a's Nachtturnier go spiele  
Und händ de Plausch gha bi mit dene Mannschafte viele  
Aber das neue System Bargeldlos zahle am Fäscht het überhaupt nüd  
verhebt  
Drumm hend's überall mit de Charte dofi Überraschige erlebt.

De Grillobig bim Reservoir obe hämmer alli gnosse  
S'Wätter het gstumme und de Wi isch gflosse  
D'Grillade händ gmundet und s'Füür het no brännt  
Für's Kafiwasser, und d' Fraueriege het ihri Chüeche trännt

Eueses Ferieprogramm het erscht am zweute Donschtig agfange  
Mit Minigolf spiele vo Naturtalent bis über üebe üebe simmer gange  
S^ nächstmol het eus de Annemarie iglade und het eus verwöhnt  
debie  
Und druuf abe esch scho de ersti August wieder gsi.

Turnerinnereis uf de Stoos verspricht im vorrus scho en Gnuss  
Nume s'Wätter verspricht nüd s'bescht aber s'wird abghalte veruss  
Uf de Wanderig nach Lauerz do schiint d Sunne mer chönnt's nüd  
besser ha  
Und bliibt eus treu demit mir au de Apero uf de Terrasse dusse chönt ha.

Am Sunntig denn ach o weh ragnet's wie us Chüble tuet eim grad weh  
Sogar wiis zuckeret isch Bergspitz das düemer alli gseh  
Drumm langet's au nume für e churzi Rundwanderig im Räge  
Und düend den d' Reis au kurzfristig ändere deswäge

Trotztallem hämmers luschtig gha uf dere Reis  
niemert wo debie gsi isch möchti das misse, sicherlich keis  
En grosse Dank de Organisatorinnen dene drüü  
Für ihre grossi Isatz und planig und Müüh.

Netzballmeischterschaft 2019/2020 stoht vor de Tür  
Und will's wenig Mannschafte het sind mer defür  
Zwei Mannschafte z'mälde und das dure en gmeinsame Bschluss  
Do cha jedi Spielerin sich isetze und muess nüd uf em Bänkli warte duss

Beid Mannschafte händ 5 Spielerinne als Bestand  
Keis dörf usfalle suscht hämmer es chliises problem a de Hand  
Mir sind jo alli positiv bim Spiele igstellt debie  
Und chönt au nueme profitiere wenn's au nume an er Erfahrig isch  
debie.

Leider hets' kei witeri Infos vom Handball gäh  
wahrschiinlich bliibt wies'isch und düent's eso anäh  
Es isch aber truurig wemmer uf e Afrog kei Antwort überchunnt  
Aber au immer wieder no froge das wird eim eifach z'bunt.

Für de Chlaushock isch dasmol i de Villa Kunterbunt reserviert  
Das isch in Bade am Wihnachtsmärt het d'Renata organisiert  
Es Raclett oder Fondue stoht als Gnuss uf em Programm  
Mir sind über zwänzg de Tisch isch uf alli Fälle ziemli lang

Mir alli gnüessed de Obig im Chäsduft und chönt zäme lache  
Es isch doch schön so en Alass mit allne zäme z'mache  
Drumm freued mir eus scho uf's nächstemol für die Ziiit  
Wer weiss was es denn git wenn's wieder isch so wiit.

Bevor ich jetzt zum Abschluss chume

Möchte ich eu allne Danke säge für alles drumume

Eu Allne für's zäme schaffe und de gueti zämehalt

De Renata für ihri super guete Turnstunde wo mir gnüesse dörfed – do wird's eim nüd chalt.

Au wenn das jetzt de letschti Bricht vo mim Amt isch hüt

Ufs Turne und uf d'Jugi verzicht ich wüerkli nüd

Mir gsänd eus witerhin i de Halle bim bewege

Det chönt sich eusi Hirnzelle nochgli rege.

I dem Sinn eui Präsidentin